

244.

पानय स्वग्वणुक व्यवहार कॅर्यथुय ।
 न्यर ग्वणसुय मंज़ मिलुनावान ॥
 शुनिकिस ध्यानस मनुय वुरिथुय ।
 चूरिमि अवस्थायि वातुनावान ॥

245.

दिह छुय कुंड शक्ती छस मंज़ुय ।
 यूग्य् यथ कुंडलिनी शक्ती वनान ॥
 मोहॅ नॅदरि ज़ीवस ज़ाग्रथ कॅरिथुय ।
 भ्रम गॉलिथ लोलु मस चावान ॥

246.

च़ाल त्युथ वाल बानु सॅदरस मंज़ुय ।
 ज़ुच़ु पम्पोशि पादन श्रोपराव ॥
 काच़ु ज़ून ज़न नेरि न्य्र्यग्वणु मंज़ुय ।
 लबुहन यार तस पान पुशाराव ॥

247.

आयस कति आश्चरुसुय बु गौमुच ।
 न्यग्वण मंजय स्व ग्वण यि द्राव ॥
 सग्वणस न्यलीफ पौठी वॅरमुच ।
 माधुर्ययि बावुक अमर्यथ मे चाव ॥

248.

चुय सुमरण चुय तन मन धन ।
 चुय रोटमख न्यथु नोन मंज मन ॥
 शांत गॅयि विषय विकार छन छन ।
 सूहम बूजिथ गॅयस कुंदन ॥

249.

प्रेच बोज नचुवनि व्रेच शोमरावुख ।
 होमुरावुख ज्ञानु अँगनस मंज ॥
 सूहम पॅरिथुय थ्यर रुमुनावुख ।
 शोमरावुख यथ सग्वणस मंज ॥

250.

वृछ चय लोलुच अजब शक्ती छय ।
तृप्ती अतृप्ती द्वनवय छस ॥
विषय विकारन निश यिवान तृप्ती ।
अतृप्ती लोलुच बडान छि बस ॥

251.

वर दिम च्चु दीवो थर च़लि मनुसुय ।
शर नेरि ज़न्मन हुंद सोरुय ॥
सीवय च़रण च़ॉन्च् फल दिम सीवुय ।
फलुक फल अर्पण च़ेय सोरुय ॥

252.

योद ब्रह्मा विष्णु रुदुर पद च़ेय मेली ।
लोलु रोस यिम छिय शुन्च् आसान ॥
लोलु पद आसान यिमनुय थोद छुय ।
क्याज़ि लोलस यिम छि मँल्च् मेलान ॥

253.

चन्द्रस जन्मय गोय चय छांडान ।
 आँखरस ह्योतमख लोलसुय मॅल्य् ॥
 लोल मोत ग्वर आव लोलस गंडान ।
 हॉरान आँसुस गॅमुच बु बॅल्य् ॥

254.

मूल्स थफ ह्यू नोन नेरि पानय ।
 मव फेर लंजि लंजि छुनु सुय ॥
 सथ चॅकुर मूलय ज़ाग्रथ गछी ।
 मृगु नाभि मंज कोस्तूरी छुय ॥

255.

न्यग्वण मान या पूज सग्वण ।
 द्वनवय तस सृत्य् मिलवान छिय ॥
 न्यग्वणस मंज लीन गछि दोगुन ।
 व्रॅच गूपियि गिंदान सग्वणस छिय ॥

256.

योद च्युय ब्रह्म व्यचारस गछ्ख ।
 बय नो कुनि ति लबख च्युय ॥
 दोगन्यार अदु च्युय पानय मुछ्ख ।
 वुछ्ख प्रथ ज़रुसुय सुय सुय ॥

257.

पानय रोटमख अदु च्युय नालय ।
 लालय वुछ्मख वुछ्छान मेय ॥
 ज़न्मादिकन हुंद गोलथम मलालय ।
 लालय लालन बैसिथ च्यु मेय ॥

258.

पानस अंदरुय प्रज़लान वुछ्छुम ।
 मुछ्छुम सोरुय तु बैरमस प्रय ॥
 आहारस नो येति ज़्यादु तोछ्छुम ।
 सु छुम शाहदत तु कोसनम भय ॥

259.

कस वनु क्याह गोमुत छुम पानस ।
दज्जुवनिस जहानस करु क्याह बो ॥
मायायि छाय सौर्यसुय असमानस ।
सँदरोव दानस गँयस शाह बो ॥

260.

ग्वरन सोरुय होवनम अँदरय ।
शष रँछिनस चरणन तल बो ॥
यछायि त्रोवुन विद्यायि बरय ।
शब्द परनुक हैछुम छल हो ॥

261.

वावु दावन द्वन कुनुय कँरिथ ।
मॉरिथ वासुना स्वरुन चु दय ॥
कनुनुय कन द्यू शब्दुय पँरिथ ।
द्वन कुन गँछिथुय रोज़िनु बुय ॥

262.

दम द्यू पानो दमन हालि ।
अदु मालि ननी पनुन्य् ज़ाथ ॥
सूहम कनव बोज़ख तालि ।
छ़ालि लबुहन वैताल नाथ ॥

263.

अँछिवुय अँछव कथा कँरिथ ।
मन आत्मस सुत्य् मिलुविथ गोख ॥
इंद्रेय च़ूरन रुमु गंड कँरिथ ।
गुप्त पॉठ्य ज़ानुय पिलुविथ गोख ॥

264.

सतुचे वते ज़ीवो पख च़ुय ।
कुनि विज़ि पानय लबुहन यार ॥
सार संसारुक युस आसुवुन छुय ।
ब्रह्म सरु मंज़ु सुय दिथियो तार ॥

265.

आगस ज़ागय मनु किस बागस ।
 लागस गुलाब तय पम्पोश ॥
 ज़ितिन्य् दिथ गोम वनु वॉरानस ।
 कागज़ कलम दिथ द्युतनम होश ॥

266.

वनान पानय लेखान पानय ।
 पानय पृछान पानस कुस ॥
 पानय बॅसिथुय छुय दानु दानय ।
 ननि वानु वनान बस बुय छुस ॥

267.

सॅदुर ह्युव व्वदुर छुय सनि ख्वतु सोनुय।
 ज़ांह नो पूर्ती तु तृफती यिवान ॥
 युथुय सोन विषयन हुंद सागर छुय ।
 यूताह दिहस त्यूत त्रेशानाह बडान ॥

268.

सोमुय हुमान गछ ज़ठर अँगनस ।
 तृफती यियियो अदु पानय ॥
 ब्वद चुय अर्पण करतो सग्वणस ।
 मन म्वकलिथ गछि कौद खानय ॥

269.

शाहानु पानो रोज़ आज़ाद चुय ।
 दाद हे तँम्य् सुंजि मायाये ॥
 श्यरुसुय मंज़ बाग न्यलीफुय छुय ।
 मेचि मेलान छि यिमु कायाये ॥

270.

पानस मंज़ुय च़ेय परनौवथस ।
 होवथम सोरुय मंज़ पानस ॥
 सूहम शब्दुय सरु करु नौवथस ।
 प्रज़ल्योख पानु मनु ज़ाँपानस ॥

273.

योद चुय राजु बनख तोति क्याह गव।
फकीर योद छुख तु गव तोति क्याह ॥
मोर बदलॉविथ फीरिथ न वुछख ।
ओसुस बु क्याह तय व्वन्त् छुस क्याह॥

274.

नर्मस मंज बल आसुवुन सोरुय ।
त्रकुजार कथ छुय बकार यिवान ॥
ज्यव छय नर्म तय शक्ती सौरुय ।
अँड्यजव रोस अँड्यजि टापुनावान ॥

275.

पानस मंज छय इंद्रेयि यिथु पॉठ्य ।
रचि रचि खँटिथ जिनि स मंज नार ॥
माँजे मंज व्वजुजार छुय यिथु पॉठ्य ।
तिथय दय बँसिथुय मंज संसार ॥

276.

खोवृर्य दँछिन्य् पतु ब्रोंठ सुय छुय ।
 अँदरु नेबुरु हेरि ब्वनु छुय पानय ॥
 वुछिवुन बोऒुवुन बोलुवुन सुय छुय ।
 तस वरॉय कुनि नो मुलेह दानय ॥

277.

रचि रचि जमाह कँरिथ च्रय थावख ।
 आँखरस केँह नो न्युन छुय सुत्य् ॥
 बाँगरुनु सुत्य् धनु मनु प्रऒुनावख ।
 यिय कँरिथ्यय येति तँरिथ गँयि कुत्य् ॥

278.

दान दिनु सुती शान छय बडान ।
 पऒि अपऒ्युक छुय बडान ज्ञान ॥
 पापव मंऒु मनुष्यस छुय कडान ।
 पानय शाँती बडान ज़यि सान ॥

279.

जन्मस यिथ क्याह पानो प्रोवुथ ।
 रावु रोवुथ अपजिस मंज पान ॥
 लूकु नेंद्याये कन चैय दोरुथ ।
 वोनुथ सारिनुय निश ब्रुय छुस जान ॥

280.

हा ग्वरु रुमु रुमु ऊँ परुनावुम ।
 वारु वारु हावुम पान चमुकान ॥
 सत्व्यचार प्रथ विजि करुनावुम ।
 वुजु नावुम प्रोन आत्म ज्ञान ॥

281.

तथ व्यचारस येलि च्चु सनख ।
 वुछख यि सोरुय असथ पूर ॥
 इंद्रैय विषय दानि ज़न मुछख ।
 बनखा पूर तु वुछख नूर ॥

282.

कल गनुनी गॅयि पोंपुर बनून ।
पनुनिस अन्तर आत्मासुय ॥
मल कॅडिथ अंतः छलुन ।
वलनुय ज्ञानुक अँतलासुय ॥

283.

योद मॉछस बोडुरावख मॅछ च़ुय ।
खसि ह्योर बेयि मॉछी रोज़ि साफ ॥
आत्म् ज्ञॉनी सुंद आत्मा छुय ।
मल प्यथ ति साफ आसान निशपाप ॥

284.

चिथु पारुद छुय नु ठीकिथ रोज़ान ।
पकुवुन ज़ल युथनु छुय ठँहरान ॥
च़लुवुन वाव युथनु म्वछि मंज़ रोज़ान ।
तिथय च़न्य्च़ल मन छुय नु ठँहरान ॥

285.

सुमरण करनु चलि मनुच व्वदौसी ।
व्वपासुय संकल्पन करुन जान ॥
प्रथ कर्मय गछि करुन व्वलौसी ।
पानय क्षण क्षण बडियो ज्ञान ॥

286.

कनुवुय बूजिथ मनुसुय स्वरुनाव ।
बनुसुय बोम्बुर यॅम्बुरजलि चय ॥
तॅथ्य् गासस मंज पानुय डुलुनाव ।
तथ लोलस छु जयकार म्योनुय ॥

287.

मव दोर पानो सोर नो संसार ।
येमि संसारु हॉरिथ सॉर्य गॅय ॥
मायायि पर्दय छ्यनुन छु दुशवार ।
त्राव वसुवास सायस सुय छुय ॥

288.

लाला लगुयो रँछिथस बाला ।
थाला सति सिनि बोरथम च़ेय ॥
ध्यानस द्युतुथम तोरुक खयाला ।
प्याला बोरमुत चोवुथ मेय ॥

289.

दय छुय नु कँन्त् तय थपि सुत्त् च़ेनख ।
मेनख तु वनख च़ु युथ छुय दय ॥
दय छुय आभास साधनायि ज़ेनख ।
फेनख ज़ॉविलि परिने च़ुय ॥

290.

लगुयो पादन थाँवथम लादन ।
नादन पानय कन दोरथम ॥
ज्ञानुय बोवुथ मनु समवादन ।
नमु पादन यिय आदन छुम ॥

291.

वॅन्यु मेय दित्युमय सॉरिसुय वति वति।
कति रूज़िथ च़ुय मे ति हाव पान ॥
स्वति स्वति नन्योख मनुसुय हा मति ।
गति च़ुय गोछहम छ्यतु प्रज़लान ॥

292.

सोपनस मंज़ स्वख द्वख छुय बासान ।
ज़ाग्रतस सॉरी छि म्वकुलान ॥
आत्म ज्ञॉनियस ज्ञान येलि व्वपदान ।
संसॉर्य स्वख द्वख भ्रम बासान ॥

293.

सथ नो संसार भ्रम तय बाँज्य गॉर ।
बासान पोज़ सोरुय अपज़ुय ॥
च़ठ ज़ॉव्युल ज़ाल योद छुय दुशवार ।
दयि नाव तारान छु फॅट्यमुतिसुय ॥

लीला

कन दोरथम लोलु बॅर्यत्यन नादन,
सत् ग्वरो छम कृपा चॉनिये ।
लोलु पोन्य् वुज़ि पानय नागरादन ॥
सत् ग्वरो छम कृपा चॉनिये ॥०॥

सुमरण पनुनी करनाव गरि गरि,
विषयन मंज़ मु रावुराव म्योन पान ।
शरणय गॅछिथ्यय च़े प्यमयो पादन ॥
सत् ग्वरो छम कृपा चॉनिये ॥०॥

मोहॅ नॅदरे छिय अॅस्य् वारु वॅलिमुत्य्,
दॅलिमुत्य् छिय अॅस्य् संसारन ।
फोलराव ग्वलाब ज़न छुख सोन आदन ॥
सत् ग्वरो छम कृपा चॉनिये ॥०॥

छस नो ह्यकान व्वन्य् खरु अंतः गॅयि,
 आभासु चानि सृत्य् साहिबो मेय ।
 दाद च़ेय द्युतथम लोलु सम्वादन ॥
 सत् ग्वरो छम कृपा चॉनिये ॥०॥

शम दम दिम बैयि सुमरण पनुनी,
 लोलु अशि छलु हॉय पाद चॉनी ।
 यितु ब्रॉह कुन करुयो आराधन ॥
 सत् ग्वरो छम कृपा चॉनिये ॥०॥

कॅह ति नो पोज़ छुय येमि संसॉरी,
 बब मॉज बैनि बॉय बांधव तु यार ।
 तारन वाल्यो छम चॉन्य् लादन ॥
 सत् ग्वरो छम कृपा चॉनिये ॥०॥

‘गनिका’ तॅरिथ गॅयि अकि रामु नावय,
 ‘शिबरी’ तॅरिथ गॅयि प्रेयमु बावय ।
 पुशि त्राव पानय हॉज़न तु रादन ॥
 सत् ग्वरो छम कृपा चॉनिये ॥०॥

सेजि नजरे चानि न्यलीफ कॅरनस,
सायि थोवथम पकुनोवथस बुय ।
वायि त्राँविथ पॅचसो सुत्य् सादन ॥
सत् ग्वरो छम कृपा चॉनिये ॥०॥

विद्यायि हुंज शक्ती छुख पानय,
सॉरी जंजाल चटवुन चु पानय ।
बावु सान प्यमुयो परणुय पादन ॥
सत् ग्वरो छम कृपा चॉनिये ॥०॥

क्षण क्षण शरनुय गछ'हरे कृष्णस,,
कर तिय यि पजि 'चँद्रय' करनुय ।
कर चु भक्ती यिछ कॅर प्रहलादन ॥
सत् ग्वरो छम कृपा चॉनिये ॥०॥

कन दोरथम लोलु बॅरित्यन नादन ॥
सत् ग्वरो छम कृपा चॉनिये ॥०॥

ॐ हरे कृष्णाय नमः